

որոտում էր մի խուլ, ծանր դղրդիւնով: Ինձ երեւում էր մի հսկայական մրջ-  
նանոց, որտեղ փոքրիկ միջատների փոխարէն, խառնուած էին միմեանց  
հետ ահագին բազմութիւն մարդիկների եւ զանազան անասունների: Շները,  
ստոար խումբերով, համարձակ վխտում էին ամէն կողմում: Փողոցներից  
անցնելու տեղ չկար: Ղավազները մեզ համար ճանապարհ էին բաց անում:  
Ամէն կողմից ես նկատում էի մռայլ դեմքեր, որոնք մի առանձին դառնու-  
թեամբ նայում էին մեզ վրայ: Մահմեդականը չէր կարող համբերել, երբ տես-  
նում է «գաւուրին» փոքր ի շատե վայելուչ կերպարանքի մէջ: Ասլանը մի եւ-  
րոպական կոնսուլի կամ դեսպանի տպաւորութիւն էր գործում: Իսկ ես այ-  
նօր, նրա պատոհիրելով, կրում էի իմ բոլոր զէնքերը. մի զոյգ ատրճանակ կա-  
պած էին իմ ձիու թամբի դաշին, մի զոյգ եւս խրած ունէի գօտիիս մէջ. ու-  
սիցս քարչ էր ընկած մի թեթեւ եւրոպական հրացան, իսկ իմ սուրը իր ար-  
ծաթեայ զարդարանքով կարող էր գրաւել բոլորի ուշադրութեանը: Յայերի  
վրայ եւս, որպէս երեւում էր, ոչ այնքան հաճելի տպաւորութիւն էր գործում  
մեր փառքը: Նրանք չէին նախանձում, այլ վախենում էին՝ չզայրացնել մահ-  
մեդականներին: Իրանց փոքրիկ խանութներում, խորասուզած զանազան  
փարչաների մէջ, նրանք զբաղուած էին իրանց արշինով եւ չէին ուզում նայել  
անգամ մեզ վրայ:

Վերջապէս հասանք փաշայի ապարանքը: Դրսից նա այնքան փառա-  
հեղ չէր, իսկ ներսից շնչում էր արեւելան բռնապետի բոլոր շռայլութեամբ:  
Ջրի շատրոանները գործում էին, սիրամարզները սիգալով ճեմում էին ծաղ-  
կազարդ պարտեզների մէջ, սեւամորթ եւ սպիտակամորթ սպասաւորները  
թիւ չուներին: Մի բարձր աստիճանաւոր ապարանքի գրիխաւոր մուտքի առ-  
ջեւ ընդունեց մեզ: Մենք անցանք մի քանի բակերից, որոնք մինը մեսուից  
աւելի գեղեցիկ էին: Խաղացող ջուրը, ծաղիկը եւ կանաչեղէնը, արեւելքցու  
սիրելիները, կենդանացնում էին բոլոր բակերը մի սքանչելի սրտապարար  
շքեղութեամբ: Սենեակների լուսամուտները զարդարուած էին գոյնզգոյն  
ապակիներով, իսկ նրանց պատերի վրայ նկարուած պատկերները ներկա-  
յացնում էին զանազան առասպելաբանական անանդութիւնների գեղեցիկ  
տեսարաններ:

Այդ տերեւների եւ ճոխութեան մէջ ծածկուած բնակարանը, որ սովոր  
էր ամբողջ գիշերները լուսացնել նոագներով, երգերով ու պարերով, ուր շա-  
լերի, մետաքսի եւ գոհարների մէջ հանգչում էին երկրի ամենաընտիր գե-  
ղեցկուհիները, այդ սիրոյ եւ վայելչութեան դրախտ էր, միեւնոյն ժամանակ  
մի դժոխք՝ յի սոսկումով եւ արտասուքով: Նրա ներքին հարկի ստորերկրեայ  
զնդաններում հեծում էին հարիւրաւոր բանտարկեալներ: Վերեւում, շքեղ